



Broj: **01/2a-05-1-32/15**

Sarajevo, 12.02.2015.

Predmet: Zabilješka sa sastanka predsjedavajuće Komisije za vanjske poslove Dušanke Majkić s ambasadorom Gruzije za Bosnu i Hercegovinu Iraklijem Koplatadzeom

U utorak, 10.2.2015., održan je sastanak predsjedavajuće Komisije za vanjske poslove Dušanke Majkić s nerezidentnim ambasadorom Gruzije za Bosnu i Hercegovinu Iraklijem Koplatadzeom.

Predsjedavajuća Komisije za vanjske poslove Dušanka Majkić pozdravila je ambasadora Gruzije Koplatadzea i iskazala zadovoljstvo posjetom. Kazala je da su Bosna i Hercegovina i Gruzija u skorijoj prošlosti imale rat i neka bolna iskustva i da je to možda razlog da se razumiju bolje. Dodala je da je Bosna i Hercegovina složena zemlja sastavljena od dva entiteta i tri konstitutivna naroda sa Ustavom koji je donesen u okviru međunarodnog mirovnog sporazuma i da ima složen sistem odlučivanja. Kazala je da jedan od entiteta Republika Srpska nema srednji nivo vlasti, a drugi entitet Federacija Bosne i Hercegovine ima srednji nivo vlasti u deset kantona tako da je sistem odlučivanja složen i skup za izdržavanje. Navela je također da Ustav jasno nalaže koje su nadležnosti države a koje entiteta, te da Parlamentarnu skupštinu BiH čine Predstavnički dom sa 42 poslanika koji se direktno biraju na izborima i Dom naroda koji je sastavljen od 15 delegata sa po pet iz svakog konstitutivnog naroda koji se biraju posredno u entitetskim i kantonalnim skupštinama. Dodala je da još uvijek postoji prilično veliki stepen nesigurnosti i nepovjerenja ali da postoji konsenzus kada je u pitanju put ka EU i ne postoji konsenzus kada je u pitanju put u NATO (zbog bombardovanja RS-a od strane NATO-a). Upoznala je ambasadora da BiH nije uspjela donijeti ključni dokument iz domena odbrane a to je takozvani pregled odbrane ili „Bijela knjiga“. Dodala je da Bosna i Hercegovina može da napravi ozbiljniji iskorak u okviru regionalnih odnosa sa zemljama bivše Jugoslavije i da nas svi upućuju na to da prethodno trebamo napraviti neki vid regionalnih integracija da bi smo mogli gajiti aspiracije za daljnje integracije. U tom smislu je navela da je Komisija za vanjske poslove baš tog dana dala pozitivno mišljenje za ratifikaciju Ugovora o pružanju konzularnih usluga građanima BiH tamo gdje Crna Gora ima DKP a BiH nema i obrnuto. Kazala je da je ekonomska situacija u zemlji teška, da fabrike iz Bosne i Hercegovine koje su u bivšoj Jugoslaviji bile nosilac razvoja više ne postoje te da Bosni i Hercegovini trebaju strane investicije, ali da je politička nestabilnost još uvijek problem. Navela je da je, pored toga što u Sarajevu imamo sjedište misije NATO-a, evropskih snaga u misiji ALTEA, Misija OSCE-a također snažno prisutna, različite institucije vrše monitoring šta se dešava na planu odbrane i sigurnosti, u posljednje vrijeme imamo sve izraženiji problem terorističkih aktivnosti navodeći primjere napada na američku ambasadu u Sarajevu i policijsku stanicu u Bugojnu. Često imamo da se na različitim krajevima svijeta pronalaze ljudi koji vode porijeklo s ovih prostora a umiješani su u terorističke aktivnosti. Dodala je da će poslije terorističkog napada u Parizu Bosna i Hercegovina morati napraviti konkretne i mjerljive rezultate u pravcu rješavanja tog problema.

Kazala je da Evropska unija snažno podržava Bosnu i Hercegovinu i da ovih dana u Parlamentarnoj skupštini BiH treba da bude usvojena izjava, koju su potpisali svi lideri političkih stranaka u BiH, koja govori o putu BiH prema Evropskoj uniji, nakon čega bi trebalo da bude aktiviran Sporazum o stabilizaciji i pridruživanju sa EU. Predsjedavajuća Majkić rekla je ambasadoru Koplataдзе da živimo u veoma lijepoj zemlji s mnogo kontrasta i da bi bilo dobro da je ambasador sa svojom rezidencijom ovdje kako bi i sam tome svjedočio.

Ambasador Irakli Koplataдзе zahvalio je predsjedavajućoj Dušanki Majkić na, kako je kazao, veoma detaljnom i informativnom uvodu koji je čuo i koji je bio jako važan za njega. Kazao je da Gruzija i Bosna i Hercegovina imaju dosta sličnosti kada je u pitanju historija ali i u izazovima s kojima treba da se suoče. Istakao je da bi se obje zemlje trebale okrenuti budućnosti i da su nam i prioriteti donekle slični, a to su euroatlantske integracije. Dodao je da je Gruzija s EU potpisala Sporazum o stabilizaciji i pridruživanju 2014. godine, te da je jedan dio tog sporazuma koji se odnosi na zonu slobodne trgovine već aktiviran, dok će drugi dio Sporazuma koji se odnosi na viznu liberalizaciju biti finaliziran do 2016. godine. Kao drugi veliki prioritet naveo je članstvo u NATO-u i kazao da Gruzija plaća veliku cijenu zbog svojih aspiracija ka NATO-u. Dodao je da na posljednjem samitu NATO-a u Velsu Gruzija nije dobila pozivnicu za članstvo u MAP-u, ali da je dobila tzv. Paket obaveza od NATO-a i da to smatraju korakom ka punopravnom članstvu u NATO-u. Kao još jedan prioritet vanjske politike Gruzije naveo je potrebu da se pronađe zajednički interes da se živi zajedno i u dobrosusjedskim odnosima s Rusijom. Kazao je da Gruzija nema diplomatske odnose s Rusijom nakon rata 2008. godine i da je njihov čvrst stav da neće imati diplomatske odnose dok Rusija ne povuče svoje snage iz Abhazije i Južne Osetije i dok ne povuku svoju odluku o priznavanju njihove nezavisnosti. Pored toga, dodao je da je prije dvije godine izabrana nova Vlada, koja je uspjela pronaći zajednički jezik s Rusijom i da sada postoji specijalni predstavnik za dijalog u kojem se nisu doticali najosjetljivijih pitanja već pitanja o trgovini i humanitarnim stvarima gdje je bilo napretka. Naveo je da je tržište sada otvoreno za vino iz Gruzije koje je još uvijek jako popularno u Rusiji i ostalu robu, a da je pojačan dolazak turista iz Rusije u Gruziju. Iako je Gruzija napravila neke korake ka normalizaciji odnosa ne dotičući se osjetljivih pitanja, kazao je da nisu zadovoljni povratnim koracima i naveo da se granica i kontrolni punktovi pomjeraju unutar teritorije Gruzije, te da je Rusija nedavno potpisala ugovor s Abhazijom po kojem će imati zajednički sistem odbrane i sigurnosti, a isti će ugovor potpisati i s Južnom Osetijom. Kako je kazao, u svemu tome ih raduje da prijateljske zemlje iz EU, OSCE-a i NATO-a daju korektne izjave u kojim osuđuju ove ugovore.

Ambasador Koplataдзе obavijestio je gđu Majkić da će Gruzija na godišnjem zasjedanju skupštine UN-a podnijeti rezoluciju o povratku izbjeglica u Abhaziju i Južnu Osetiju i izrazio želju da i Bosna i Hercegovina glasa za tu rezoluciju. Što se tiče ostalih pitanja bilateralne i multilateralne saradnje, ambasador Koplataдзе kazao je da postoji mogućnost da se pojača saradnja između dvije zemlje te spomenuo dva sporazuma u vezi s turizmom i trgovinom koja će biti potpisana. Spomenuo je i vrlo blisku saradnju koja postoji s ambasadorom BiH u Ankari koji pokriva i Gruziju kazavši da postoji i mogućnost povezivanja parlamentaraca dvije zemlje. Čestitao je i pohvalio praksu potpisivanja sporazuma sa Crnom Gorom o uzajamnom predstavljanju u DKP-ima.

Dušanka Majkić kazala je da razumije potrebe Gruzije i dodala da Bosna i Hercegovina nema zakon o vanjskoj politici, jer postoje različiti vanjskopolitički ciljevi i u takvim okolnostima ima problema kad treba glasati o nečemu u UN-u i na drugim međunarodnim tijelima. Zbog nepostojanja konsenzusa o nekim pitanjima, dešavaju se nesporazumi i usljed

toga dolazi do izostajanja glasanja o nekim pitanjima, kazala je Dušanka Majkić i zamolila ambasadora Koplataadzea da pokuša to razumjeti.

Ambasador Koplataadze zahvalio se i izrazio nadu da će se postići konsenzus o rezoluciji Gruzije, tim prije što se radi o čisto humanitarnoj rezoluciji koja se odnosi na povratak izbjeglica. Što se tiče aspiracija prema članstvu u EU i NATO-u, izrazio je nadu da se može saradivati u postizanju zajedničkih ciljeva, kao i nadu u brzo formiranje vlasti na nivou Bosne i Hercegovine.

Dušanka Majkić zahvalila je ambasadoru i izrazila očekivanje da će se saradnja između parlamenata nastaviti nakon formiranja parlamentarnih grupa prijateljstva.

SEKRETAR
KOMISIJE ZA VANJSKE POSLOVE

Merdžana Iglica

Dostavljeno:

- Kolegiju Predstavničkog doma
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol
- a/a